



Inatsisartuni ilaasortamut
Bentiaraq Ottosenimut, Atassut

09-12-2024
Suliap normua: 2024 - 23019

Postboks 930
3900 Nuuk
Oqarasuaat (+299) 34 68 00
Faxi (+299) 43 02
E-maili: an@nanaoq.gl
www.naalakkersuisut.gl

Qinngarsuinikkut pinerluttarnerit pillugu § 37 malillugu apeqqutit akineqarnerat

Asasara Bentiaraq Ottosen

Qujanaq apeqqutinnut. Apeqqutitit ataasiakkaarlugit ataani assilillugit allanneqarput, akissutinillu malitseqartinneqarlutik. Akissutinnut atugassanik Inatsiseqarnermut ministereqarfimmit paasissutissanik pissarsisoqarsimavoq.

- 1. 2023-imi Nunatsinni qinngarsuinikkut pinerluuteqarnerit qassiuppat?**
- 2. Qinngarsuinikkut pinerluuteqarneq (hate crime) allatullu pinerluuteqarnerit nalunaarsorneqarnerini immikkoortinneqartarpat?**

Akissut:

”Apeqqutit akinissaannut atugassanik Inatsiseqarnermut ministereqarfik Rigspolitiiniit oqaaseqaatinik pissarsisimavoq, taakku tulluuttunik paasissutissiipput:

”Akissummut atugassamik Rigspolitiit Kalaallit Nunaanni Politiinit oqaaseqaatinik pissarsisimapput.

Politeeqarfiup sulianik suliarinninnermut systemiani, Avannarlermi, oqaatsit “hadforbrydelser” aamma “racediskrimination” assaat atorlugit ujaasinermi 2023-imut inerniliussanik nassaartoqarsimanngitsoq, Kalaallit Nunaanni politiit paasissutissiissutigaa.

Avannarlermi qinngarsuinikkut pinerlunnerit immikkut ittumik nalunaarsorneqarnissaat periarfissaanngitsoq, Kalaallit Nunaanni Politiit aammattaaq paasissutissiissutigaa. Tamanna systemip killilimmik nalunaarsuinissamut periarfissaqarneranik, ilaatigullu Kalaallit

Nunaanni qinngarsuinikkut pinerlunnerit (pinerluttulerinermi § 100-p, assigiinngisitsinermik pinerluutinngortitsisup, saniatigut), immikkut ittumik pinerluutinngortinneqannginnerannik pissuteqarpoq.””

3. Naalackersuisut qinngarsuinikkut pinerluuteqarneq (hate crime) akiorniarlugu iliuseqarnissaminnut pilersaaruteqarpat?

Akissut:

Naligiissitaaneq assigiinngisitsinnginnissarlu pillugit Inatsisartut inatsisaat malillugu inatsimmi, § 4 malillugu assigiinngisitsinermit aalajangiinnermut tunngaviit: suaassuseq, naartuneq, meeravissiartaarneq erninermi sulinngiffeqarneq, kinguaassiutitigut sammivik, suaassutsini kinaassuseqarneq, suaassutsimik takutitsineq, suaassutsit ilisarnaataat, kingoqqiffik, ammip qalipaataa, inuiaqatigiinni, inooqatigiinnermi imaluunniit inuianni pinngorfik, innarluuteqarneq, ukiut, politikkikkut isiginnittaaseq, upperisaq imaluunniit upperisaqarneq pissutigalugit nakkarsaaneq assigiinngisitsinerlu inerteqqaapput.

Aalajangiinnermut tunngaviit qulaaniittut pissutigalugit innutaasut kikkugaluartulluunniit assigiinngisitsivigineqarnerisa akiorneqarnissaat Naalackersuisut pingaartittorujussuaat. Qinngarsuinikkut pinerlunnerit akuerineqarsinnaanngilluinnarput, aamma tamanna inatsisiliornermi ersersinneqassaaq.

Taamaammat inatsisit atuutsinneqarnerannut suliassaqarfimmi ukiumoortumik pingaarnersiutinertut atatillugu, pissutsit sukannernerulersitsisut pillugit pinerluttulerinermi inatsimmi aalajangersakkamik, qallunaat pillaasarnermik inatsisaanni § 81-p assigisaannik, ilanngusseqqullugu Naalackersuisut allakkatigut 17. marts 2023-imi ullulerneqarsimasutigut, Inatsiseqarnermut ministereqarfik noqqaassuteqarfigisimavaa, taamaalilluni ilaatigut qinngarsuinikkut pinerlunnerit aamma ilaatinneqalerniassammata. Pinerlunnerit, qinngarsuinermik tunngaveqartut, pineqaatissinneqarnermik qaffasinnerusumik pineqaatissiisutaasinnaanissaat, tamatuma kingunerissavaa.

Inuup ataqqinassusaanik nikanarsaanerit pillugit pinerluttulerinermi inatsimmi § 99-imi qinngarsuilluni oqalunnerit pinerluutinngortinneqarnikuupput, aamma assigiinngisitsineq § 100-imi pinerluutinngortinneqarnikuuvoq aamma inunnut amerlasuunut tamanut oqaaseqarnerit ilaatigut tassani pineqarput.

Tamatuma saniatigut ilaatigut sianiginninnissaq pilersinniarlugu nunat tamat akornanni ulloritinneqartuni qinngarsuilluni pinerlunnerit aamma qinngarsuilluni oqalunnerit Naalackersuisut ukkatarisarpaat, kingullermik qinngarsuilluni oqalunnerit qisuariarfigalugit iliuuseqarnissaq pillugu Naalagaaffiit Peqatigiit ullorititaanni ulloq 18. juni 2024-imi tusagassiuutinut nalunaaruteqarnikkut.

Qinngarsuilluni pinerlunnerit akiorneqarnissaat, Naalackersuisut isumaat malillugu ataatsimoorussamik inuiaqatigiinni akisussaaffigineqarmat, pingaaruteqarpoq erseqqissassallugu. Qinngarsuilluni oqalunnerit aamma ikinnerussuteqartunut imaluunniit inuiaqatigiinni eqimattakkuutaanut aalajangersimasunut qinngarsuinerit inatsisiliornerinnakkut akiliarneqarsinnaanngillat. Nakkarsaaneq erseqqissumik takugunikku, kikkut tamarmik akuersinnginnertik takutittariaqaraat, kiisalu nunami maani innuttaasut tamatta immikkut assigiinngitsuunitsinnik akuersissasugut, Naalackersuisut isumaqarput. Qinngarsuinikkut pinerlunnerit nungutinniarlugit, aammattaaq Naalackersuisut isumaat malillugu, inoqatigut qanoq assigiinngitsigigaluarpataluunniit, meeqqatta akaarinninneq inunnillu allanik ataqqinninneq pillugit naleqartitat malillugit perorsarneqarnissaat pisariaqarpoq. Ataatsimoorussamik akisussaaffiup taassuma tamanut nalunaarutigineqarnissaa Naalackersuisut soqutiguassavaat.

Inussiarnersumik inuulluaqqusillunga
Med venlig hilsen

Naaja H. Nathanielsen

Naaja H. Nathanielsen